

KOLOSE

Polu koyoto epi'ehina fayahi

1 ¹⁻²Oho, Kolose hepato boana'ise. Nehafihe? Lenali Hu'mamofihu naga'i nehana bona'ise. Lenali lali hiti Yesu Kilisitohi naga'i moneko babeyafa huto koguna noito nominota bona'ise. Hu'ma afotifihi fuluna'a hiti hetofana hu lepalalina'a lenalitoga mineno. Nani Hu'mau nele'mo ho ti'ehina bo Yesu Kilisitohi aposolo bo Poluita ma fayahi nokoyobe. To logonati Timoti hiti fayahi nokoyo'ibe.

Hu'mamofitoga lofokehi luse'na

³Le'ali asaga yupahi lenali kumu Hu'mamofihu loka noho'ina kanagu Hu'mamofihu fokeha'a nolu'ibe. Ai Sipi Boti Yesu Kilisitohi afo'afu nohinagihe. ⁴To lenali Yesu Kilisitohi keheli ule'ale hite agoya hu emi'ahanaganamu to Hu'mamofihu bonatoga asaga'i leniginaga fite kaba nehananamu kehelilototi'a Hu'mamofihu fokehi nolu'ibe. ⁵To lenali Hu'mamofihu hetofa kaga, ya'ma ka lamana'a lenalitoga kohe toto o'ehina kanaguti Hu'mamofihu bati hina'a kokulumaga molo lepolo'ehina'a alihii lilune lite bu mege'ahana'mu geba hite neminabe. ⁶Ana ka lamana'auba lenali keheli'ahana kagauba buto asaga melugu bonatoga nehetito i futili huto enele'mo bati nohina yabe. Ana kaga hapa'a ma ni'ina. Hu'mau foipa bona'magihi enele'mo bati hulata bo nohibe. Lenali yata'a kehelite komopatini i gelehe hi'ahana supo hite fato fato bona'magi yatai ana hite hetofa kaga'a kehelite neminago Hu'mau lusa gi epololata nohibe. ⁷⁻⁸Lalalutifu gi'a Epafalasiu le'ali hiti Yesuhi lili'na hetofa huto nolina bo to Hu'mamofihu kagamo yata'a lu lepi'ehina bouba yatai lalitoga nehetito Hu'mamofihu Sikalafu'auba enele'mo fulu hu'ehigo enali koguna ite minete ai kaba hinogo ai kaba hinogo hilata hite neminana yabe luto lenali kumu ya lu le'emi'ehina.

⁹To kehelilototi'a yalo Hu'mamofihu lenali kumu loka hoto minolata nohu'ibe. Ai lu keheli'ehinanamofihu lenelepilebi luto loka noho'ibe. To ai Sikalafu'uba lenele'mo eto hinogo bati hite to keheliya ise'natinini asaga'i

hokolo hilibe luto loka noho'ibe. ¹⁰To yalo lenali asaga yupahi aitoga minete hetofana hite neminenogomo Sipi Boti ai lenofokehi lilina'mu yabe. Ya'ma le'ali loka noho'ibe. To lenali asaga yupahi Hu'mamofifi lagamo keheliba keheliba hite minete, to bona'i enehe'malata ya'ma hetofa lili'natini fato fato'i yamofifi legeya'a babu luto hilina ya hinogomo Hu'mamofifi hapa'a keheli bati hilete hetofana suhi hite minete ya hilabe luto loka noho'ibe. ¹¹To Hu'mamofifi amuya'a lenalitoga huto hinogo yanauba amuya molo lepalalina to lenifi taga huse'na huto nohinogomo kosele'i mehese aitoga ule'ale hite minalabe luto luloto to Hu'mau komopatinigu sabiyana lolo hu lepalalibe luto loka noho'ibe. ¹²Lenali asaga yupahi Hu'mamofifi gepohi lite bati huse ka lu emite enegelo bilata nehilo. Ai afotifu lele'mo bati hu'ehigo ai'a fana tose kapo'a huto hulenogomo anagu minete ai'a bona'a hiti bati hu'ehinana'a fato fato'na lilune. ¹³Ai Satahi amuya'amofi hiti metepuhi hu'ehina kapo'aguti lele'mo kefefe huto lubuto bi'ehina. To ai'a pana'a gi moneko pana'amofifi kapogo lele'mo molo'ehina yabe. ¹⁴To ai'a pana'auba Yesu golaha'aloti lalimo mina fito foipanati i pa so leto'ehina bo nohibe.

Kilisitohi hapa'a ka

¹⁵Hu'mamofifi lali bu mego'ohuta bo nohinaya aku'i ai'a pana'a Kilisito ai Hu'ma legi huto moneko'i nohina bo yabe. Ai koyapa kanagu Hu'mau asaga'na lolo mehu'ehina kanagu mino'ehina bo to asaga'na lolo hu'ehinamofifi Yesu ai be ligi'ehina bo nohibe. ¹⁶To Hu'mau le'mo ho ti'ehina bo, Yesu ai kokulumalugu nasana to melugu nasana asaga'na to ya'ma lali bu nogotana hiti bu megotana hiti yege yege'i lolo hu'ehina yabe. To ai agelo bo fato fato'i enele'mo huto huloto kapo'anigu enele'mo nomoloto to kibina bona'ani hiti sipi kaba bona'ani hiti to gamani bona'i hiti ya'ma lolo huto enele'mo ho ti'ehina. To ya'ma asaga melugu mine'ahananamo Yesu to Hu'mau hiti lili'na neli'igo asaga'na lolo hu'ehina yabe. To ya'mu asaga'na ai'na'a ni'ina'mu yabe. ¹⁷Ai koyapa koyapa'i mino'ehina bo nohibe. Asaga'na huto mehina kanagu ai mino lito mino'ehina to ai'a kaba nohigo asaga'na aitoga hepito asaga'namofifi hapa'a bati bati huto mino'ehina yabe. ¹⁸To asaga bona'magita Hu'mamofifi ka'a mege'i moloto nohuta lali gufa'a nohutogo to ai Yesu latahatiga nohuto kaba nohibe. Ai Kilisitohi naga'i lele'mo huto hu'ehina bo yabe. To ai kohe toto fili'ehinaguti ho ti'ohuto alahi ho tilana bona'magi ai mege'i melete ho tilabe. Ya huta ni'inogo ai'asigo asaga'na kohe toto be ligi'ehina bo nohibe. Ka hapa'a ya huto ni'ibe. ¹⁹Hu'mau pana'niloga nemeha'ni mino baga noibe luto lu kehelito ligo ya'ma Hu'mamofifi hapa'a moneko legege hu'ehina bo nohibe. ²⁰Ya higo ai pana'a, Yesu malipu yafalonofilito golaha'alo asaga sibina hi'ahana i pa soto Hu'mamofifi le'mo fulu hu'ehigo yatai kokulumalugu

nasana asaga'i to melugu nasana asaga'i aitoga minalibe luto golaha'a he'mi'ehina yabe.

21-22 To lenali koyapa lengekesa foipa yigisetini'mu to lenipagu sibina hilata hise'natini'mu Hu'mamofiji fateha'a lolo hi'ahana bona'i foto'i mine'ahago lenele'mo bati hulago ete lalu'agita nehana yabe. Yesu ai Hu'mamofiji gobisalo lenele'mo molo'ehina yabe. To hiya hutobe? Lenali kumu yabe luto gufa'a he'mito malipu yafalo fili'ehina. Ya hu'ehinagi Hu'mau mone ka lepekilina'a meni'igo bu'alo ho tite neminabe. Yatai foipa bona'i menehana fotogo bona'i to bebe sose bona'magita neminabe. 23 To lenali yatai amuya melete Yesutoga minete komopatini emite minete ka lamana'amofiji yata'a keheli ule'ale hi'ahana kamu'i li pili kete ya'ma legeya'a huto hilinamofiji geba hite kehelise'natini mopo mopo mehilata nohigo ya hite minalo. Ya'ma nani Poluita, ka lamana'a nasanamofiji kele kele bo nohuna, asaga bona'i melugu neminanamofiji ya'ma nani ka lu yege holata nohunamofiji, ya'ma kehelilo.

Polu mono foya nolinamofiji ka'a

24 To nani lenalitoti nagabu foya konofunanamu'i nipa'ni sibina mehuse fokehi nolube. Hena'mube? Lali Kilisitohi gufa'a nohuta bona'magi kumu gabu foya kofilina mone'a ni'ina nani he'moto kofinogo su halibe luto nohuna yabe. 25 Hu'mau nani Kilisitohi naga'i nehana bona'magihi koko pana'ani nele'mo'ohuto'a noho lifigo buto lenali Yuta gegisaguti fegutoga nehana bonatoga buto Hu'mamofiji suguna ka lu lepilube'mu hunogo keheli bai talana'mu yabe. 26-27 Ana suguna ka koyapa bona'magihi lu meepise mino'ehinaya to yatai lali aitoga komopati nobina bona'magi kumu lu hokolo hu noletabe. To lenali fegutoga bona'i aitoga neminamagi kumu lu hokolo hu lepalalibe. Ana suguna ka henana ni'ibe? Ma ni'ibe. Kilisitou lenali komopatinigu nominenogomo lenali Hu'mamofiji fana meha'agu minalabe. 28 Hapa'a ya huto ni'inagi le'ali Kilisito kumu luto kaga lu yege hoto leli huto buto asaga bona'i lu epilata nohu'ibe. Le'ali amuya moloto asaga bona'i lipoti epiloto to asaga kaga lu hokolo hu noepito hulata nohu'ibe. Hena'mube? Enali Kilisitotoga mino hepite bati nehinogo Hu'mamofiji bulo enele'moto bilu'ibe luto nohu'ibe. 29 To nani ana lili'nalo amuya moloto liba liba nohubue. Komopa'nigu Kilisitohi amuya'auba nehe'mago ana lili'na nolube.

2 ¹To nani lenali'i to Leotisea hepatoga bona kumu to nokaba'ni bu mege'ahana bona kumu lusi lili'na noluna nekehelifiye? ²To ana lili'na henabe luto nolube? Enali ai he'menogo ai he'menogo hite koguna ite nehite ai ginaga fi eminogo ai ginaga fi eminogo minalabe luto foya nolube. Ana huto enali Hu'mamofiji komopa'a keheli fe lite loe lae mehise minalabe luto to Hu'mamofiji suguna ka l'emo huto hu'ehinana'a

hana'a kehelilabe luto foya nolube. To ana suguna ka hapa'a henana ni'ibe? Yesu Kilisito bo yabe. ³Ai Hu'mamofihu kehelise'na'amofihu biha'a nohibe. Hu'mamofihu kehelise'na'a fala kito ni'inaya ai Yesu lu hokolo hu lepololenogomo ai'a hetofa hetofa ka'a asaga'i kehelilabe.

⁴Ya hu'ehinagi lenali mone fato bouba faga faga luto lu epilenogo mekehelilo. Mone fulu huto luto laga hina ka luto lu nolepinogo lenemegesa hi emilo. ⁵Nani lenali hiti moneka nohuto Kilisitohi keheli ule'ale hite komopatini molo emite amuya melete nehana nokehelube. Nani fotoga nohunaya aku komopa'ni lenalitoga nomoloto nokehelube.

Kilisitotoga molo emite hetofana hu lepalalina'mu yabe

⁶Lenali Yesu Kilisito kibina boti minalibe lite aitoga komopatini mele'ahana suhi hite aitoga hepite asaga yegegu minalo. ⁷Lenali yaga legi hite minete aitoga lufusatini limite bati hite tiba tiba hite amuya yafa lolol hilo. To Hu'mamofihu kaga yata'a lu lenelepi'ohunana amuya melete keheli emiba emiba hite minalo. To Hu'mamofitoga lenegelo bite komopatinigu sabiyana bai tenogo minalo.

⁸To fato bona'magi kehelise'natin le'mo sibina hilune'mu nehanagi enemege'i memalalo. Enali Yesu Kilisitohi ka lu melenelepise enali'ani enekesa kehelite to ma melugu nehana bona'magihi hapa'ani anasi kehelite mono'i li sibina hite ka lu lepilabe. Yesuhi kaga mekehelise nehite faga faga lite lu lenelepidanamo kaba hu bati hilo. ⁹⁻¹⁰To lenali nekehelibe. Kilisitohi komopa'agu Hu'mamofihu meha'a bai toto nominabe. To ai asaga kibina bomagihii kibina bo'ani to kaba bo'ani kokulumagufi melugufi nehanana ai enebe ligilata nohigo lenali to ai hiti moneka nehite lenemehatini bai toto bati huto ni'igo mine bati bati nehana yabe.

¹¹To lenali Kilisitotoga elago ai lenugufatini laga mehuse komopatinigu foipa hapatini amuya'a laga hu he'mi lepolo'ehina. Ya nohuto enugufa laga nehana suhi huto komopatinigu hu lepolo'ehina. ¹²To nagami folose nehana hapa'a henana ni'ibe? Mana ni'ibe. Lenali nagami'i nefelete Kilisito hiti fililete keligu limilete aku ai hiti ho netibe. Foipa hapatinimu'i fililete ai hetofa hapa'amu aku'i ho tite minalune'mu hite nagami'i fele'ahana yabe. Hapa'a ya huto ni'ibe. Hu'mamofihu amuya'auba Kilisitohi fili'ehinaguti le'mo ho ti'ehina supo huto lenali lenele'mo ho ti'ehibe. To henabe luto lenele'mo ho ti'ehibe? Lenali aitoga agoya hu emi'ahanamo'mu yabe. ¹³Lenali koyapa Moseu keya ka lu'ehina kamofihu mekehelise fegutoga bona'i minete foipa faipa hapatini hilata hi'ahanaya Hu'mamofitoga filise'nalo mine'ahana yabe. Yalo Hu'mau Kilisitohi le'mo ho ti'ehina suhi huto lenele'mo ye ko'ehina. Hu'mau foipanati asaga'i li he'mi let'oehinagihe. ¹⁴Ai foipanati li he'mi let'oohuto'a to lali asaga keya ka mege'i memorose sibina hu'ohutana

fayahi go'ehina ya'ma ka foya melilube luto fi sibi huloto Yesuhi hiti malipu yafalo nili ho'ehina ni'inagihe. ¹⁵ Ya nohuto Satahi ka lepekilina'a ka foyagu lenele'mo malalina'a laga hu'ehibe. Kilisitou malipu yafalo fililoto foipanatini li he'mi nolepoloto Sataha naga'i enele'mo laba hu'ehigo fateha'a fi lehe toto nebago yatai asaga bona'i Hu'mamofifi amuya bo nohibe lite kehelilabe luto enelepi'ehina.

¹⁶ To ya hu'ehigo lenali nose'na menose'na'mu to sipi yupahifi mono fuli yupapofi yana'mu to yuhufa ikapo o nebeleno yana'mu hiti kaga melete ka lepekilana meni'ibe. Ya'mu mekehelilo. Ana fato boubia ya suhi huto hu lepolo'ehinagomo bati mehu'ehibe. ¹⁷ Ya'mana samapaha'a legi huto fa'menena ni'ibe. Ya'mana alihia Hu'mamofifi kapo'agu minese hapa'a meni'ibe. Anamofifi lusi hapa'a ai Kilisitou nohibe. ¹⁸ To bona'i mone'amagi enali'ani enegekesa yigi yigi nehanana to bamu'i bu neganana lusi mono ka ni'ibe lite, lali lenabe ligi'ohuta nohune lite liyafa hite neminabe. Faga nelina bona'i nehabe. Enali enugufa'ani le'mo sibina nehitelani to agelomagihu Hu'ma tegi hite nehabe lite enali'ani enegekesa yigise'na'ani liyafa nehana yabe. Ya bati mehina yabe. Enalimoya lenalitoga ete ana suhi hite minalo lite ka lepekinogomo enemege'i memalalo. Enali komopatiniguti sabiyanatini lu he'mi lepalalana'mu yabe. ¹⁹ Enali Kilisitotoga hepite meneminabe. Ai latahati nohinogo lali gumita'a nohuta hupa'atu to go'nuna'atu hiti li hepito ai hiti moneko'na nohuto Hu'mau lu molo'ehina suhi luto hofa notone. To enalimoya Kilisito latahatigati i pa sete he'mi'ahana bona'i nehabe.

**Yesu fililoto aku aho ti'ehinamo lenali foipanatini'mu
filite kosaba minose'na ni'ibe**

²⁰ To lenalimoya ma melugu bona'magihi hapa'aniguti ali gulufe su he'ahana. Kilisitou hiti ana hapamu'i afili'ahana yabe. Ya hi'ahanaya lenali ya'ma melugu bona'magi hapa'ani henabe liteaku'i mege'i nemalabe? ²¹ Nose'na henamo'mu mone ya'ma kayahi melibo lite to mone ya'ma mo sibo lite to mone ya'ma kayatu bako mehubo lite nelana, lenali henabe lutobe kehel'i'ahana? ²² To ya'ma nose'na hiti ana'ina hiti asaga'i minoba minoba hilina nasana ni'ififiye? O'e. Su halina'a fa'menena ni'ibe. To enali ya'ma nemalana ka ana huto fa'mene bona'magihi kaga anasi ni'ina yabe. Kilisitohi kaga meni'ibe. ²³ Ana, ya'ma kaga'ani agelomagihu liyafa hilo lite to lenugufa le'mo laba hilo nelana kaga hetofa ka legi huto ni'ibe lite mone'amagi kehelilanaya ana kagauba lenugufa le'mo bati mehilina'mu yabe. Ya'ma kagauba lenubuto bilina'a meni'inagi lenali ya'ma mekehelise minalo.

3 ¹Lenali Kilisito hiti ho ti'ahana bona'i nehafiye? Ai nohina kapomu'i sa sa hite lenegokesa yigilo. Anagu Kilisitou Hu'mamofifi yahi lamaga'aga nominabe. ² To lenali ma melugu ni'ina nasana'mu lenegokesa

meyigise kokuluma kapogu ni'ina nasana'muko lengekesa malalo.

³Lenali fili'ahana bona tegi hite nehite ma melugu ni'ina nasana'a

he'mitetini Kilisito hiti Hu'mamofitoga lenemehatini mele'ahana yabe.

⁴To alihii Kilisitou lali minose bihati nohina bouba fana meha'a hiti aku
oto nehetilenogo lenali ana hite fana meha'agu nehetilabe.

Bona'mamgihu tafa hapa'a hiti to kosaba hapa'a ni'ina

⁵Lenali ma melugu bona'magihi hapa'ani li he'milo. Moko lise'na
yagi, ana'i gumina folose'na yagi, kolotananamofifi hapa'a yagi,
lenipagu keheli sibina huse'na yagi, to foipanamofifi hapa'a asaga'i
komopatiniguti li he'milo. To ma me'mofifi nasana asaga'i laga
lepesise'na yana'mu lu laga hite he'milo. Ya'ma melugu nasana laga
lepesise'namoya lugefa suhi huto ni'ina melugu bona'magi Hu'mamofifi
le'mo laba hilata nehana ana'ina melugu nasana'a liyafa hite kanihi filata
nehana. Lenali ya'ma hapa'aya mege'i memalalo. ⁶To ya'ma suhi lite
neminana bona kumu Hu'mau sipi ka epekilina'mu yabe.

⁷⁻⁸Lenali koyapa'i ma melugu bona'i minete ana suhi lite mine'ahanaya
to yatai ana hapa'a li he'milo. Kolo tose kata li he'mite hulata nehana
supo hite foipa hapatini li he'milo. Kele'na ka luse'na yagi huli ka
luse'na yagi to fato bona le'mo buya huse ka hiti li he'milo. ⁹To ai
bahane hanogo ai bahane hanogo hite meminalo. Ya'ma tafa hapatini
mino'ehinaya lenali ananamo li gololo tite li he'mi'ehite yatai yuhufa
bona'i lolo hite neminabe. ¹⁰Hu'mau lenele'mo kosaba higo asaga kanagu
ai'a meha'a legitia minalabe luto lenele'mo bati bati nohuto kehelise'natin
hokolo nohigo yuhufa bona'i lolo nehabe. ¹¹To Hu'mau ya nohu lepalago
fato fato bona'i meminese moneko bona'i nehabe. Mone Yuta bona'i to
mone fegutoga bona'i meni'ina. Ana huto enugufa laga hise bona'i to laga
mehise bona'i meni'ina. To naga'i emite koko hise bona'i to naga'i melise
bona'i meni'ina. Bona'i hapa'ani fato fato'na ni'inaya ya'mana fa'menena
ni'ibe. Kilisitou ai lali fato fato bona'i asaga'i lele'mo moneko babeyafa
hu'ehina. Ai bona'i yege yege'na lele'mo moneko hu'ehina. To ana huto ai
yege yege bonatoga minalibe.

¹²Lenali Hu'mamofifi bona'a nehabe. Ai keke'i nolu lepoloto
lenele'mo'ehibe. Ya hu'ehinagi lenali fato bona kumu leniginaga fi epelete
fulu hite enehe'mete agoya hite minalo. ¹³Foipanatini ai li he'metenogo ai
li he'metenogo hite minalo. To lenali folagahatinigu mone bouba kele'mo
sibina nohinogomo kai kipagu fulu hinogo nohuto le'mo bati hubo. Sipi
Botiuba lenali sibina nohuto le'mo bati hubo. Sipi Botiuba lenali sibina
hi'ahanana ali he'mi lepoloto lenele'mo bati hu'ehinagihe. Ai hapa'a
mege'i malalo. ¹⁴To amuya melete asaga bona kumu leniginaga filo.
Ya hiletie lenali asaga'i bati hite koguna ite moneko'na hite minalabe.
¹⁵Hu'mau folagahatinigu Kilisitohi fuluna'a minalibe luto lenele'mo

moneko'na hu'ehinagi fuluna'auba lenipagu kaba hinogo fulu hite minalo. To Hu'mamofihu fokehi lilo. ¹⁶Kilisitohi hetofa hetofa kaga'a komopatinigu mineno. Keheli bati hite ai ka lepinogo ai ka lepinogo hite minalo. To Hu'mamofihu gepohi lite yege fise nama litetini to Sikalafu'i komopatinigu lepi'ehina nama litetini laga hina nama ya'ma lite Hu'mamofitoga ana nama asaga'i lilo. ¹⁷To asaga'na hilana'a to kaga lilana'a Sipi Boti Yesuhi gi'a liyafa nehite minalo. To ai kumu Hu'mamofihu fokehi lilo.

Lalamehi minose hapa'a

¹⁸Lenali ana'magita bahatinimagihi keheli epilo. Ya'ma Yesu Kilisitohi naga'i neminana ana'magi ana suhi lite nehana yabe. ¹⁹To lenali bomagita lihatinimagihi leniginaga fi epite lenipagu logo mebino. ²⁰To lenali yagapanan'magita itotinigihi afotinigihi agoya hu epilo. Ya nehinogo Hu'mau lenofokehi lilibe. ²¹To lenali afo'anigita yagapanatini kele'na ka lu epiba epiba hite meminalo. Fa'mene kele'na ka lu epilata nehinogo enali kosele'i enohoto enipagu keta hilana'mu yabe.

²²To lenali lili'nalo bona'magita sipi botiniloga agoya hu emilo. Asaga lepi'ahana lili'na li bati hilo. Asaga yupahi bu lenagana kana hiti bu melenagana kana hiti lili'na amuya melete nehinogo Hu'mau kehelito lenofokehi lilibe. Ya'ma kehelite lili'na babahi hite alilo. ²³To asaga lili'namo fato'na amuya melete lilata minalo. Melugu neminana bona'mofihu lili'na'anisigo meni'ina yagi Sipi Bomofi kumu lili'na liluta nohune lite kehelite amuya melete lilo. ²⁴To ya nehinogo Sipi Botiuba hetofa nona'a babu luto lepilina'mu yabe. Ai'a molo lepolo'ehinamofihu mina'a fuku luto lepilina'mu yabe. Lenali sipi botini ma melugu bona'mo menohigo, Kilisitou ai Sipi Botini lili'na kaba huse botini nohinagihe. ²⁵To Hu'mau kegeiyo nehana bona'magihu ana huto sibi nona'a epilina'mu yabe. Ai bu'alo yege yege bona'i moneko'na nehabe luto nokehelibe. Ai keheli fotogo huto epilina'mu yabe.

4 ¹To lenali kaba bo nehanamagita kele kele panatini enele'mo hetofana hite to bebe sose hapa hite enele'mo bati hilo. Lenali Kaba Botini mone kokulumalugu nohinamofihu lenekesu meheno.

Kehelina ka yabe

²To kosele'i mehose amuya melete Hu'mamofitoga fokehi nelite nunumu hite Hu'mamofihu loka holata nehite minalo. ³To lali kumu luto loka nehete Hu'mau ai ka lamana'a suguna ka'a Yesu Kilisito kumu ana kaga babu bona'i lu epiluta kapo hokolo hu letalibe lite loka halo. Nanimoya yatai ana ka lamana'a lu yege hose'na'mu naga'i li'ohuna yabe. ⁴To nani kumu yabe lite ana kaga lu yege hoto lu epilenogo keheli fe lilabe luto loka halo. Hu'mau nani'i anana'mu noho lifilehigo ya'ma lili'na nani'ni lusiga lilube.

5 Enali Kilisitohi naga'i menehana bona'magihi fulu hite kehelilete bebe sana hapa'a hi epalalo. Ya hite, asaga yupahi ka lamana'a lu epise'namofih i kapo'a sa sa hite mone fa'mene memin ese'nehe'mete Yesuhi hapa'a enelepilo. **6** To lenali kaga nelanaya ka laga'a hiti fulu'a hiti lite neminenogomo enali ka kehelilabe. To enali mone kaga lenoloka nehenogomo ka'anilo nona'a bati hite aku'i lu epilabe lite kehelilo.

Anasi su halina ka

7-8 Lalalutifu mone gi'a Tikiku nani lenalitoga ho lifilube. Ai ana huto Sipi Botimofih i lili'na bo nohuto kosele'i mehose nehe'molata nohina yabe. Ai lenalitoga buto lali kumu lu lepilenogo kehelilete komopatin i keta holatana'mu babahi huto higo lenali lenegelo bilabe. **9** To lenali bonatini mone gi'a Onesimasi loe hiti bila'ibe. Onesimasiu ana huto lalalutifu nohuto kosele'i mehose Hu'mamofih i lili'na bo'a lagati lebesina bo nohibe. Ana loe bole lenalitoga bilet e ma hepatoga huto nohinana'a asaga'i lu lepila'ibe.

10 To mone bouba gi'a Alisataku nani hiti'l naga'i li'ehina bouba lenali kumu nehafe luto noligo fayah i nokoyobe. To ana huto Makiu, Banabasihi etali'afih i pana'a, ai lenali kumu nolibe. Nani ai kumu alu lepi'ohunagi to lenalitoga nehetilenogomo be tigite le'malo. **11** To Yosua mone gi'a Yasatasi ai ana huto lenali kumu nolibe. Enali ya'ma loebe monebe bona'magi enaligo Yuta bona kegi'agati ete Hu'mamofih i kapo'a lili'nalo nehe'mete neminabe. Enali amuya melete nehe'melatanamo sipi'a ni'ibe.

12 To lenali bonatini mone gi'a Epafalasi ai Yesu Kilisitohi lili'na bo'a lolo hu'ehina bouba ana huto lenali kumu nehafe luto nolibe. Ai asaga kanagu lenali Hu'mamofitoga loe lae mehise ule'ale hite minete agoya hi emite minalabe luto nunumu huto amuya moloto Hu'mamofih i loka hoto nominabe. **13** Ai lenali kumu amuya lili'na nolina bo nohigo bu go'ohuna yabe. To ana huto Leotisia hepato bona kumu hiti Hilapolis hepato bona kumu amuya moloto lili'namo nolina kehel'i'ohube. **14** To laga lebesina bo, Luku, ai lusa bo nohina yagi to Temasi ana hite lenali kumu nehafe lito nela'igo nogobe.

15 To lenali Leotisia bonatoga enebe tigite ka'ni lu epilo. To mone a'mo, gi'a Nifa aitoga to Yesuhi naga'i ai'a nonugu li gehesa nehana bonatoga ana hite enebe tigite ka'ni lu epilo. **16** To lenali ya'ma fayapo leka se su helete Leotisia bonatoga epinogo enali li nupa hite leka salabe. To ana'mu enali fayah i koyo epolo'ohunana lepinogo lenali leka salo. **17** To mone bo, Akipasi, ma lite lu emilo: Sipi Botiu kimi'ehina lili'na yamofih i mehe'mise li baga ibo.

18 Nani Poluita nani'ni nayaha'nitu fayah i koyoto ma luto nolepube. Nalalu'nigita nehafe? Nani ya'ma noluto to naga'i li'ohunaya lenekesu meheno. Hu'mamofih i lenehe'mose'nauba lenalitoga mino moloto mineno.